



## KETE MANARUA

### Tikanga ā-lwi 2024

92080 Te whakaatu māramatanga ki ngā tikanga Māori e pā ana ki te pupuri me te tuku mātauranga


NGĀ WHIWHINGA: 4

92081 Te whakaatu māramatanga ki ngā tirohanga kē ki tētahi o te wā

NGĀ WHIWHINGA: 4

Ka tūwhera a 'MyNZQA' ki te tuku i te Kete Manarua hei te 1 o Oketopa rānei.

Ka kati a 'MyNZQA' hei te 30 o Oketopa, 2024



*“Kāore i kotahi te whakahaere o ngā tikanga ā-iwi. He iwi anō me ōna tohunga me ōna tikanga me āna whakahaere. Hiki atu he iwi, pērā tonu. Nō reira, kia mau koe ki ōu ake.... Mā ō rātou uri e mau ō rātou nā kōrero. Engari kia mau koe ki ngā kōrero a ōu mātua, a ōu tūpuna. Ina ka tika, ka waiho mai ētahi mātauranga hei taonga mōu.”*

*(Te Whatahoro, 1865)*

# Ngā Ihirangi

He Kupu Whakataki	3
Tūmahi Aromatawai (92080)	6
Tūmahi Aromatawai (92081)	9
Kupu Taka	11



# Kete Manarua

## *Ka maka te pakapaka, ka ohu te karoro*

**Kete** - ko te kete i pū mai i te pā harakeke me tōna whakapapa.

**Manarua** – e rua ōna mana. Tuatahi, ko te mana o ngā taonga ka kohikohia me ngā mahi huhua ka whakatutukihia e te ākongā. Tuarua, ko te mana o te ākongā, ko tōna whānau, hapū, me tōna iwi hoki, ko tōna ake mana motuhake tonu.

## Te Motuhēhē o ngā mahi

E taea e koe te ako ngātahi, te mahi ngātahi rānei i ētahi atu tangata hei kohikohi kōrero i ngā puna tautoko huhua. Heoi, me mātua mōhio nei te Pouako, nāu anō ngā mahi i whakarite, i whakatakoto.

Hei akiaki tonu i te hāponotanga o āu mahi katoa me whakamahi anō koe i āu ake kupu, ka mutu, ka kaha hāpai i ngā tikanga tohutoro e whakamana anō ai te puna o te mātauranga.

Mā te mihi e whakaatu, e whakanui hoki i ngā tāngata me ngā puna awhina i puta ai āu nā mahi. Hei tauira:

- He rerenga kupu poto e tohu ana i te pūtakenga mai o tētahi kōrero;
- He rārangi tohutoro i te whārangi whakamutunga o ngā mahi;
- He mihi ki te tangata | puna awhina;
- Ngā momo puna awhina, puna kōrero rānei:
  - » Kōrero ā-waha: he uiui kaumātua, pakake, rangatira, mātanga rānei;
  - » Ngā pukapuka i whakaputa;
  - » Ngā pukapuka kāore i whakaputa;
  - » Wāhitau ipurangi.

## Te Tāpae i te Kete Manarua

Ko ngā tāpaenga Kete Manarua me mahi mā te pūnaha hou (kei te pae ipurangi matua o MyNZQA): [Tāpaetanga pūnaha hou NZQA](#).

E pai ana te tāpae mai i ngā taunakitanga hei kōnae matihiko, ahakoa kōnae oro, kōnae ataata rānei, hei PDF kē rānei, hei kōtuinga rānei o ngā mea e rua. Me he taunakitanga ā-pepa, me matawai, ka tuku ai hei PDF. Me whakakī anō hoki e te Kaiako te Pukauhi Kete Manarua mō ia kōpaki Kete Manarua ka tukua kia aromatawaia.

Māu anō āu mahi e tukuatu i te tuatahi. Tēnā, matakia te ataata, tikiake rānei i ngā tohutohu e whakaatu ana me pēhea te tuku atu i ngā tāpaenga Kete Manarua mā te pūnaha hou [[How-to Resource](#)].

Mēnā kei te hiahia āwhina ki te tuku atu i ngā tāpaenga Kete Manarua, tēnā, kōrero ki tō Kaiako, ā, māna koe e awahi, e tautoko.



*Māori Woven Artwork.* Photo credit: Rafael Ben-Ari. Adobe stock (#67581275).



# TIKANGA Ā-IWI

92080

Te whakaatu māramatanga ki ngā tikanga Māori e pā ana ki te pupuri  
me te tuku mātauranga  
(Kaupae 1, Whiwhinga 4)

Kairangi	Kaiaka	Paetae
Ka tātari i ngā ariā matua e ārahi ana i te pupuri me te tuku mātauranga.	Ka whakaahua i ngā ariā matua e ārahi ana i te pupuri me te tuku mātauranga.	Ka tautohu i ngā ariā matua e ārahi ana i te pupuri me te tuku mātauranga.

# Tūmahi Aromatawai- I roto i Te Ao Kapa Haka

## Te Ngohe

Ko tāu nā mahi he whakarite whakaaturanga hei whakamārama i o ake whakaaro e pā ana ki ētahi tikanga ā-iwi ki roto i te ao haka.

## Te Horopaki



Te Wharekura o Hoani Waititi Marae, 2016 ASB Polyfest.

He maha ngā tikanga Māori ki roto i te ao Kapa Haka. Hei tauira; ko ngā waiata tawhito, ngā momo moko, ngā kākahu, te tū ā-lwi me te mita o te reo. Ko tāu nā mahi, he whakarite i tētahi whakaaturanga e whakamārama ana i ngā hua pai, kino rānei o ēnei tikanga, ngā tuku ihotanga o te mātauranga me ngā ariā matua e pupuri ana i te mana me te mauri o ērā tikanga.

Māu anō ngā kōrero, e rangahau, e tautohu, e kohikohi, kātahi ka whakaputa tuhinga, kiriata rānei hei whakaatu i tō māramatanga ki te kaupapa i tātarhia e koe.

## Hei Mahi

1. Mā te ākongā e whiriwhiri kia 3 ki te 4 ngā tauira o te ao haka mai i tōna anō rohe.  
*Tauira: Kapa Haka, ngā whakangahau i runga marae, he pōhiri.*
2. Mā te ākongā e āta rangahau i tētahi tikanga tuku iho mai i aua rōpū, me whai tohutoro e mārama ai te kaupānui nō hea ēnei kōrero.  
*Tauira: ngā titonga tawhito, ngā momo moko, ngā horopaki o ngā titonga, ngā kākahu, ngā whakakai, whakaniko rānei.*
3. Mā te ākongā e tūhonohono ngā kōrero tuku iho me ngā kōrero katoa i roto i tōna whakaaturanga hei whakaaweawe i ngā rerekētanga o aua tikanga.

4. Ka uiuitia, ka rangahauhia te tuku ihotanga o ngā mātauranga me ngā tikanga pupuri kōrero o tērā hapū, o tērā iwi, o tērā kapa.
5. Tāutuhia ngā tohu matua, ngā kupu, ngā whakaahua, ngā whakataukī rānei hei taunaki i ō whakaaro.
6. Ka oti i a koe tō rangahau, ka hanga i tētahi whakaaturanga, ki te tātari, ki te arotake i aua tikanga o te ao haka o tō rohe.

## Hei āwhina

Me whakaatu te ākongā i te tukanga rangahau i ngā mahi katoa:

- ngā tikanga Māori me ngā tirohanga Māori huhua,
- ngā puna kōrero whānui me āna kupu whakamihi,
- ngā kohinga kōrero/tatauranga e kōtūi ana i te whakaaro,
- te whakaponotanga o ngā whakaaro, pēnei i te taukumekume,
- te tūhonotanga o te kaupapa ki te ākongā.

## Ngā Mahi hei Tāpae

Mā te ākongā e whiriwhiri;

He tuhinga e 250-300 kupu te roa.

He kōrero 3 meneti te roa rānei.

Hei te **30 o Oketopa 2024** te rā aukati mō tēnei aromatawai.

### MĀTĀPUNA:

Te Wharekura o Hoani Waititi Marae - 2016 ASB Polyfest

*Growing confident, connected young leaders.* (n.d.). <https://www.tpk.govt.nz/mi/mo-te-puni-kokiri/our-stories-and-media/growing-confident-connected-young-leaders>. Photo credit: Cherrilee Fuller Taiao Photography.





# TIKANGA Ā-IWI

92081

Te whakaatu māramatanga ki ngā tirohanga kē ki tētahi take o te wā

(Kaupae 1, Whiwhinga 4)

Kairangi	Kaiaka	Paetae
Ka tātari i ngā tirohanga kē ki tētahi take o te wā.	Ka whakaahua i ngā tirohanga kē ki tētahi take o te wā.	Ka tautohu i ngā tirohanga kē ki tētahi take o te wā.

# Tūmahi Aromatawai - Te Ngau Kino a Parawhenua mea



Te arawhiti o te awa o Waikari kua riro i te parawhenua mea 2023). Photo credit: Newshub

## Te Horopaki

E mōhiotia whānuitia ana e tātou ki te maha o ngā takerehāia kua pā mai ki Te Tai Rāwhiti. Kua pakaru ngā arawhiti, kua kowania te whenua, ā, kua tāoro hoki ngā kāinga i te parawhenua. Atu i te waipuke, ko tētahi āhuetanga matua i puta ake, ko ngā pāpātanga o ngā mahuetanga ki ngā mahi tapahi kōporo i ngā ngāhere ki Te Tai Rāwhiti.

## Hei Mahi

1. Kōwhiria tētahi takerehāia kua pā mai ki tētahi rohe, ki ētahi rohe rānei o Aotearoa. Tērā pea, kua pā mai tētahi takerehāia ki tō rohe.
2. Tautohua ngā āhuetanga matua o te takerehāia nei<sup>1</sup>.
3. Tātarihia ngā tirohanga matua ki te takerehāia, arā ki ngā mahinga i hua ake, i runga anō i te rerekē o ngā tirohanga a tēnā, me tēnā.
4. Tātarihia hoki ngā tūāhua ā-rohe, ā-motu, ā-ao whānui rānei e whai pānga ana ki tētahi rōpū, ki tētahi whānau, ki tētahi hapū, ki tētahi iwi rānei<sup>2</sup>.
5. Me whaiwhakaaro koe ki tā te tangata titiro rerekē, te waiaro, te whakapono rānei ki te takerehāia, ki te tūāhua rānei<sup>3</sup>.

6. Tēnā, whakaritehia tētahi whakaaturanga ā-waha, ā-tuhi rānei hei whakaatu māramatanga ki ngā tirohanga kē ki te takerehāia kua kōwhiria nei e koe.
7. Ka taea e koe te mahi takitahi, ā-rōpū, ā-pūtahitanga rānei, ki te rangahau kōrero me te whakarite mahi, engari me mātua takitahi te whakatakoto taunakitanga mō tēnei aromatawai ā-waho.

## Ngā mahi hei tāpae

- He whakaaturanga ā-waha (3 miniti te roa), ā-tuhi rānei (250-300 kupu te roa).
- Tāpirihia he taunakitanga, arā he pārongo whakairoiro, he kohinga whakaahua me ōna whakamārama, he hopukanga kōrero, he kiriata, he rauata, he tuhinga, he whakaaturanga, he rātaka, he pakipūmeka, he uiui, he kōrero tuku iho, he mahi toi, aha atu, aha atu.

Hei te **30 o Oketopa 2024** te rā aukati mō tēnei aromatawai.

<sup>1</sup> - Arā ko ngā parakino, ko ngā parahanga, ko ngā āhuatanga o te huarere (āra ko te huripari, ko te waipuke, ko te āwhā), ko ngā take mō te wai (ko te wai māori, ko te moana rānei), te whenua Māori, te mahi tahi a te Māori me te Karauna, me te āhuarangi hurihuri, aha atu, aha atu.

<sup>2</sup> - He tūāhua hītori, tōrangapū, pāpori, ohaoha, porihanga, he whanaketanga, he kōkiritanga ā-iwi rānei, he tohetohe, he porotēhi, he porotū, he tautohetohe, he pakanga, he whakarerekē ture, me te whakawehenga, te whakakotahitanga ā-iwi rānei hoki. Kei reira anō pea ngā take i pērā ai tana tirohanga, tae atu ki ngā mahinga, ētahi urupare rānei i puta ake, i ngā mahinga hoki i hua ake.

<sup>3</sup> - Ko tā te tangata tirohanga e kōrerotia nei, ko ōna waiaro me tōna whakapono, me ōna whakaaro ki te take.

### MĀTĀPUNA:

#### **Te arawhiti o te awa o Waikari kua riro i te parawhenua mea.**

Rutherford, Karen. (2023, May 13). *Big day for Hawke's Bay as new bridge opens between Wairoa and Napier following Cyclone Gabrielle*. Newshub. <https://www.newshub.co.nz/home/new-zealand/2023/05/big-day-for-hawke-s-bay-as-new-bridge-opens-between-wairoa-and-napier-following-cyclone-gabrielle.html>. (Photo Credit: Newshub.)

# Kupu Taka

<b>Kete Manarua</b>	Kohinga taunakitanga nā te ākongā.
<b>Pae pāhopori</b>	Ngā pae matihiko o ngā whatunga papori pēnei i a Paeāhua, TikTok rānei.
<b>Pātai matawhawhati</b>	Ngā pātai kua rere māori noa, kāore he whakamōhio tōmua.
<b>Pukauhi taunakitanga</b>	He whārangi whakarārangi me te whakatūturu i ngā taunakitanga.
<b>Tāpaetanga</b>	Te tuku i ngā mahi.
<b>Titonga tawhito</b>	Mōteatea, waiata tangi, apakura, manawawera, haka.
<b>Moko</b>	Mataora, Moko kauae, Pūhoro.
<b>Kākahu</b>	Pari, Piupiu, Maro, Tāniko, Tīpare, Korowai me ngā tohu toi Māori.
<b>Ngā horopaki</b>	Ngā kaupapa o ngā titonga.
<b>Parawhenua mea</b>	Te waipuke.